

13 kumpulan ambil bahagian

Festival Koreografi Antarabangsa (Feskor) 2018

UB 7.11.2018 A4

TUARAN: Sebanyak 13 kumpulan tari termasuk dua dari Indonesia dan satu dari Filipina mengambil bahagian dalam Festival Koreografi Antarabangsa (Feskor) 2018 yang diadakan di Dewan Sri Sulaman, bermula malam Isnin.

Feskor dianjurkan Kelab Artis Tari Universiti Malaysia Sabah (ARTUMS) bekerjasama dengan Lembaga Kebudayaan Negeri Sabah (LKNS), Jabatan Kebudayaan dan Kesenian Negara (JKKN) Sabah dan Gabungan Anak Seni Tuaran (GAST).

Timbalan Ketua Menteri merangkap Menteri Perdagangan dan



PESERTA dari Sanggar Galaxy Production Bekasi Indonesia bersama Suhaimi (lima dari kanan) dan Cahyono (enam dari kanan).



CAHYONO bersama peserta dari ISI Padang Panjang.

Perindustrian Datuk Wilfred Madius Tangau yang diwakili oleh Pemimpin Pembangunan Masyarakat Tamparuli Jefrey Teo berkata program itu wajar dijadikan program tahunan.

“Ini kerana, ia dapat menghimpunkan koreografer dari dalam dan luar negara sekali gus dapat bertukar-tukar pandangan dan ilmu khususnya berkaitan dengan seni tari.

“Bukan itu saja, program ini secara tidak langsung akan dapat mengeratkan lagi tali silaturahim antara mereka,” katanya.

Beliau yakin lebih banyak lagi negara akan menghadiri festival itu pada masa akan datang dan secara tidak langsung akan dapat mempromosikan tempat

tempat menarik di Malaysia khususnya Sabah.

Penyelaras Feskor Suhaimi Magi berkata antara objektif program adalah memberi ruang dan peluang serta pendedahan kepada koreografer dan penggiat seni tari di Malaysia dan luar negara.

Selain itu, ia juga bagi memantapkan kualiti persembahan tari dengan meningkatkan pemahaman dunia koreografer melalui karya yang berbagai dan menanam serta meningkatkan minat peserta dalam dunia ciptaan tari sebagai usaha memperkaya khazanah seni persembahan.

Sementara itu, Sanggar Galaxy Production Indonesia dari Bekasi dan Institut Seni

Padang Panjang Sumatera mewakili Indonesia dalam festival itu.

Konsul Fungsi Sosial Budaya, Konsulat Jenderal Republik Indonesia (KJRI) Kota Kinabalu Bapak Cahyono Rustam mewakili Konsul Jenderal hadir dalam majlis pembukaan itu.

Feskor berlangsung 5-9 November dan dimeriahkan dengan persembahan tari dan bengkel koreografi. Filipina diwakili Kontemporaryong Gamelan Philipino (Kontra-Gali).

Turut hadir dalam majlis itu ialah Pengerusi GAST Salleh Kahar, Hajiji Lamiri mewakili Dekan Fakulti Kemanusiaan Seni dan Warisan dan kenamaan lain.



SEBAHAGIAN peserta Festival Koreografi Antarabangsa 2018.